



Aningaasaqarnermut Naligiissitaanermullu Naalakkersuisoq

Ulloq: 22. september 2022
J.nr.: 01.31.06/22-00995

Aningaasaqarnermut Akileraartarnermullu Ataatsimiititaliap pingasunngornermi ulloq 21. september 2022-mi aalajangiineranik Naalakkersuisunut ilisimatitsineq.

Akit qaffannginnissaannik utaqqisaannaagallartumik iliuuseqarnissaq. Ataatsimiititaliap suliaa nr. 01.31.06/22-00995.

”Naalakkersuisut inassutigaa,

- Kontumi pingarnermi 20.05.45 ”Akit qaffannginnissaannik iliuuserisassat” aningaasaliissutit 2022-mi 30 mio kr.-nik qaffanneqassasut,
- Aningaasaqarnermut Naligiissitaanermullu Naalakkersuisoq, kontumut pingarnermi 20.05.45 ”Akit qaffannginnissaannik iliuuserisassat”-mi oqaasertaliussat naapertorlugit piginnaatinneqassasoq Royal Arctic Line isumaqatiginninniarfigissagaa ingerlatseqatigiiffiup 2022-mi ukiup sisamararterutaata naggataani uuliamut akinut tapiissutitut akiliutigittagaat, katillugu 30 mio. kr.-p tungaanut sinaakkuteqarluni, sinneruttullu atunngitsuukkat 2022-mi ukioq naatsorsuusiorfiusup naanerani Nunatta Karsianut utertinneqassasut,
- ukiakkut nioqqutissat nassiunneqareertut aamma pisarineqareertut Royal Arctic Linep isumaqatigiissutaani ilaatinneqassasut,
- 2022-mi ukioq naatsorsuusiorfimmi IST-p inerana 30 mio. kr.-nik appariassasoq.”

Aningaasaqarnermut Akileraartarnermullu Ataatsimiititaliap oqaaseqaatai apequtaalu:

Naalakkersuisut inassuteqaataat siuliani allassimasut ataatsimiititaliamit qujassutigineqarput. Suliamik suliarinninnermi Aningaasaqarnermut Naligiissitaanermullu Naalakkersuisoq ataatsimiititaliamit siunersiorneqarpoq, tamatumanilu suliaq pillugu ataatsimiititaliap apequtini akissutissarsivai.

Tassunga atatillugu matumani immikkut ittumik aningaasaliissuteqarallarneq Royal Arctic Linep assartuinnermut akigititamik, aningaasaliissutit atugassiissutigineqartut amerlaqataannik, appaananik kinguneqassasoq Naalakkersuisut ataatsimiititaliamut qulakkeerinnissutigaa.

Isumaqatigiissuteqarnerulli iluaqutissartaasa atuisunit malugineqarnissaat Naalakkersuisut ataatsimiititaliamut tamakkiisumik qulakkeerinnissutigisinnaanngilaat. Matumani ataatsimiititaliamit immikkut eqqarsaatigineqartut tassaapput isertitakinnerit. Akit aalajangersimasumik allanngortinneqarnissaat niuertunut pinngitsaaliissutigissallugu Naalakkersuisut inatsisitigut tunngavissaqaratik paasissutissiissutigaa. Taamaattumillu tapiissutit isertitakinnerusunit pissakinnernillu nalinginnaasumik iluaqutissarsiffiunnginnissaat eqqarsaatigigaanni aningaasat taama amerlatigisut aningaasaliissutiginnissaat ataatsimiititaliamit eqqarsarnartoqartinneqarpoq. Taamaattumillu ataatsimiititaliap isumaa malillugu aningaasaliissutit

akit qaffanginnerannik sunniuteqanngitsoorsinnaanerat aarlerinarpallaarpoq, naak taama sunniuteqarnissaat Naalakkersuisunit qularutigineqanngikkaluartoq.

Taamaattumillu akuersinermut atatillugu piumasaqaatit uku marluk eqquutsinneqarnissaannik ataatsimiititaliap piumasaqarnera ataatsimiititaliamut aalajangiisuvoq:

- Piumasaqaat siulleq tassaavoq aningaasaliissutit atuisunit iluaqutissarsiffiunissaannik qulakkeerinnittumik isumaqatigiissuteqarnissaq anguneqaqqullugu Naalakkersuisut suliaq pillugu niuernermit eqquussuisunik inuussutissarsiortunillu oqaloqatiginninnissaat. Taamaaliornikkut pinngitsoortinneqaqqullugu aningaasaliissutit eqquussuisunut inuussutissarsiortunullu tapiissutit tunniunneqarnissaat. Tamanna pissaaq Royal Arctic Linemut isumaqatigiissuteqarnissaq sioqqullugu.
- Piumasaqaatip aappaa tassaavoq aningaasaliissuteqarnermi tunngavigineqartut eqquutsinneqarsimanersut pillugu Naalakkersuisut kingorna ataatsimiititaliamut nalunaarusiornissaat.

Aningaasaqarnermut Ataatsimiititaliap aalajangiinera

Siuliani allassimasunik piumasaqaateqarluni Naalakkersuisut inassuteqaataat Aningaasaqarnermut Akileraartarnermullu Ataatsimiititaliamit **akuersissutigineqarput.**

Inussiarnersumik inuulluaqqusillunga

Hans Peter Poulsen

Aningaasaqarnermut Akileraartarnermullu Ataatsimiititaliap siulittaasua